

# Doktrina ug mga Pakigsaad 23–24: Tambag gikan sa Ginoo

Pagpili og bisan duha sa mosunod nga mga tawo nga basahon ang mahitungod kanila. Pangita og mga hugpong sa mga pulong diha sa mga bersikulo nga nagkonektar sa makasaysayanong pagpamubo. Makatabang kini kanimo nga makakita og ebidensiya nga ang Langitnong Amahan ug si Jesukristo nakaila sa matag tawo ug mitanyag og tambag alang sa ilang personal nga mga kinabuhi.

## Oliver Cowdery

### DOKTRINA UG MGA PAKIGSAAD 23:1–2; 24:10–12



Si Oliver usa ka magtutudlo. Nag-alagad siya isip tigsulat ni Joseph Smith Jr. sa dihang naghubad sa Basahon ni Mormon. Usa siya sa Tulo ka mga Saksi sa Basahon ni Mormon ug mao ang ikaduhang elder sa gipahiuli nga Simbahan. Iyang gipakigbahin ang ebanghelyo ngadto sa pamilyang Whitmer ug sa iyang ubang mga higala sa Fayette, New York. Sa pipila ka mga higayon ang iyang garbo napakita, lakip na kausa sa dihang misulat siya ngadto ni Joseph Smith Jr. mahitungod sa bahin sa usa ka pagpadayag diin siya wala mouyon. Ang iyang garbo nakapahimo kaniya sa pagbiya sa Simbahan sulod sa usa ka panahon tali sa 1838 ug 1847.

## Hyrum Smith

### DOKTRINA UG MGA PAKIGSAAD 23:3



Si Hyrum magulang nga lalaki ni Propeta Joseph Smith. Mitabang siya sa pagmantala sa Basahon ni Mormon pinaagi sa direktang pagtrabaho sa tig-imprinta. Siya adunay dakong tinguha sa pagsangyaw sa gipahiuli nga ebanghelyo, apan gihangyo siya sa paghulat ug pag-andam pinaagi sa pagtuon sa pulong sa Dios (tan-awa sa Doktrina ug mga Pakigsaad 11:21–22). Nag-alagad siya isip presidente sa unang branch sa Simbahan sa Colesville, New York. Gituman ni Hyrum ang iyang katungdanan sa Simbahan ug nagmatinud-anon sa Ginoo sa tibuok niyang kinabuhi.

## Joseph Knight Sr.

### DOKTRINA UG MGA PAKIGSAAD 23:6–7



Si Joseph Knight Sr. usa ka suod nga higala ni Joseph Smith Jr. ug mipakita kaniya og dako nga kaayo. Gihatagan niya og mga kagamitan ang Propeta samtang nagtrabaho siya sa paghubad sa Basahon ni Mormon. Mibati siya og tinguha nga magpabunyang kauban sa uban sa adlaw nga natukod ang Simbahan, apan naghulat siya tungod kay gusto niya nga magtuon pa gayod sa Basahon ni Mormon. Sa wala madugay human makadawat sa tambag sa Ginoo diha sa Doktrina ug mga Pakigsaad 23, si Joseph Knight Sr. mipili nga magpabunyang. Nagpabilin siyang matinud-anon nga miyembro sa Simbahan sa tibuok niyang kinabuhi.

## Joseph Smith Jr.

### DOKTRINA UG MGA PAKIGSAAD 24:1–9



Si Joseph Smith Jr. mao ang Propeta sa Ginoo. Niadtong Abril 1830, gitukod ni Joseph ang gipahiuli nga Simbahan. Diha-diha dayon, ang bag-ong Simbahan miatubang og pangbiaybiay. Si Joseph gidakop sa sayop nga mga sumbong ug gibuhian. Siya adunay responsibilidad sa pagsangkap sa iyang pamilya ug sa pagpangulo sa Simbahan sa samang higayon. “Bisan busy kaayo siya sa bag-ong simbahan, kinahanglan dayon niyang tamnan ang iyang umahan kon gusto niya nga dunay maayong ani panahon sa tinglarag. Ang iyang balayranan sa amahan ni Emma sa umahan nalangay na, ug kon mapakyas ang iyang pananom, kinahanglan siyang mangita og laing paagi aron mabayran ang iyang utang” (*Mga Santos*, 1:103).